

Zahtjev za davanje saglasnosti za isplatu naknade za rad predsjedniku, članovima i sekretaru Komisije za polaganje diplomatsko-konzularnog ispita

Zakonom o vanjskim poslovima („Službeni list CG“, broj 70/17) propisano je da se diplomatsko-konzularni ispit polaže radi provjere sposobnosti kandidata za samostalnu primjenu propisa i vršenje diplomatsko-konzularnih poslova u nivou diplomatskih zvanja za koje je zakonom ili drugim propisom, kao uslov za rad, utvrđen taj ispit (član 80 stav 1), te da se diplomatsko-konzularni ispit polaže pred komisijom koju obrazuje ministar vanjskih poslova za svaku kalendarsku godinu (član 81 stav 1).

Ministar vanjskih poslova donio je Rješenje o obrazovanju Komisije za polaganje diplomatsko-konzularnog ispita broj: 012/6-7/2 od 18. februara 2019. godine, a čiji je zadatak da postupi u skladu sa odredbama Pravilnika o programu i načinu polaganja diplomatsko-konzularnog ispita („Službeni list CG“, broj 81/18), i koji će obavljati tokom 2019. godine u vremenu i mjestu koje odredi ministar vanjskih poslova, te da predsjednik, članovi i sekretar Komisije imaju pravo na naknadu za rad, za svaki sprovedeni ispitni rok tokom 2019. godine, u skladu sa Odlukom o kriterijumima za utvrđivanje visine naknade za rad članova radnih tijela i timova ili drugog oblika rada („Službeni list CG“, br. 26/12, 34/12 i 27/13). Dodatno, ministar vanjskih poslova donio je Odluku o vremenu i mjestu polaganja diplomatsko-konzularnog ispita broj: 012/6-7/1 od 18.02.2019. godine kojom je predviđeno da se diplomatsko-konzularni ispit polaže u martu i oktobru 2019. godine.

Članom 8 stav 1 Odluke o kriterijumima za utvrđivanje visine naknade za rad člana radnog tijela ili drugog oblika rada („Službeni list CG“, br. 26/12, 34/12 i 27/13) propisano je da se članovima komisije odnosno drugog radnog tijela koji nijesu obuhvaćeni ovom odlukom, zavisno od obima, složenosti, multidisciplinarnosti i rokova za izvršenje postavljenog zadatka, može utvrditi naknada uz prethodnu saglasnost Vlade. Članom 81 stav 3 Zakona o vanjskim poslovima („Službeni list CG“, broj 70/17) propisano je da predsjednik, članovi i sekretar Komisije za polaganje diplomatsko-konzularnog ispita imaju pravo na naknadu za rad u visini koju propisuje Vlada. Dodatno, članom 26 Zakona o zaradama zaposlenih u javnom sektoru („Službeni list CG“, broj 16/16, 83/16, 21/17, 42/17, 12/18, 39/18 i 42/18) propisano je da zaposleni ne mogu ostvariti druge naknade osim onih koje su utvrđene ovim zakonom, s tim da se ovo ograničenje ne odnosi na ispitne komisije koje se organizuju u javnom sektoru u skladu sa zakonom, a služe za sticanje zvanja i zasnivanje radnog odnosa, finansiraju se iz sredstava koja uplaćuju kandidati u skladu sa zakonom, a mogu se isplatiti uz saglasnost Vlade po prethodno pribavljenoj potvrdi organa zaduženog za poslove finansija o raspoloživim sredstvima.

Članom 80 st. 3 i 4 Zakona o vanjskim poslovima („Službeni list CG“, broj 70/17) propisano da diplomatsko-konzularni ispit može polagati pripravnik koji je završio program stručnog osposobljavanja u Ministarstvu vanjskih poslova u skladu sa ovim zakonom, državni službenik iz člana 64 stav 2 ovog zakona, kao i lice iz člana 53, člana 64 stav 6 i člana 72 ovog zakona, koje ima radno iskustvo na diplomatskim poslovima najmanje dvije godine, s tim da zakonom nije propisano da kandidati uplaćuju sredstva

za polaganje ispita, već su sredstava za isplatu naknada obezbijedena u budžetu Ministarstva vanjskih poslova.

U skladu sa navedenim, a imajući u vidu da Zakon o vanjskim poslovima (član 81 stav 3) propisuje pravo na naknadu za rad u Komisiji za polaganje diplomatsko-konzularnog ispita, a polazeći od značaja, složenosti, obima i dinamike posla, predlaže se da se predsjedniku, članovima i sekretaru Komisije za polaganje diplomatsko-konzularnog ispita utvrdi naknada za rad u iznosu od po 300 Eura neto za svaki sprovedeni ispitni rok tj. ukupno 4200 Eura neto ($7 \times 300 \times 2 = 4200$), odnosno ukupno 6678.08 Eura bruto na godišnjem nivou.

Predlog zaključaka:

1. Vlada je razmotrila i usvojila Zahtjev za davanje saglasnosti za isplatu naknade za rad predsjedniku, članovima i sekretaru Komisije za polaganje diplomatsko-konzularnog ispita.
2. Vlada je saglasna da se, do donošenja propisa iz člana 81 stav 3 Zakona o vanjskim poslovima, naknada za rad predsjedniku, članovima i sekretaru Komisije za polaganje diplomatsko-konzularnog ispita, isplati u skladu s Odlukom o kriterijumima za utvrđivanje visine naknade za rad člana radnog tijela ili drugog oblika rada i to u neto iznosu od po 300 eura za svaki sprovedeni ispitni rok tj. ukupno 4200 eura neto, odnosno ukupno 6678.08 eura bruto na godišnjem nivou.
3. Naknada iz tačke 2 obezbijediće se iz budžetskih sredstava Ministarstva vanjskih poslova.